

**Uunga siunnersuut: Inuussutissarsiummik ingerlataqarneq pillugu Inatsisartut  
inatsisaat nr. xx, xx.xx 2015-imeersoq**

**Kapitali 1**

*Atuuffia*

**§ 1.** Inatsit nioqquqtiisanik tuniniaanermi namminersorluni inuussutissarsiummik ingerlataqarnermut atuuppoq.

**Kapitali 2**

*Aalajangersakkat nalinginnaasut*

**§ 2.** Inuussutissarsiummik ingerlataqartut IIN-imi normu kiisalu piginnittup aqqa najugaalu allallugit pisiniartunut ersarissumut allagarsiissapput.

*Imm. 2.* Nuisitsivimmi, saqqummersitsivimmi, timersortartut katerismaarneranni niuffaffimmilu tuniniaanermi aaqqissuisoq kingusinnerpaamik aaqqissuussinerup ammarnerani inuussutissarsiummik ingerlataqartut aqqi, najugai aamma IIN-imi normua allallugit allattuiffiliorsimassaaq. Allattuiffik aaqqissuussinerup matoreernerata kingorna ukiuni tallimani paarineqassaaq aammalu nakkutilliinermut oqartussaasunut piumasarineqartillugu tunniunneqassaaq. Peqataasoq IIN-imi normumik peqarnissamik pisussaaffeqanngippat taamaallaat aqqa najugaalu allanneqassapput.

**§ 3.** Tupanik nioqquqtiisiat, imigassat 1,21 procentimik annertunermillu aalakoornartortaqartut, tipigissaatit aamma kusanarsaatit, imeruersaatit kiisalu sukkulaatinik sukkunillu nioqquqtiisiat tuniniaavinnit piffissami minnerpaamik qaammatini sisamani ataannartuni minnerpaamik sapaatip akunneranut ataasiarluni tuniniaaviusartuni taamaallaat tuniniarneqarsinnaapput.

*Imm. 2.* Taamaattorli assersuutigalugu niuffaffinnik, saqqummersitsinernik, timersornermik pisoqarfennik saqqummersitsillunilu tuniniaavinnik ingertaqarfiusunut atatillugu nioqquqtiisanik taakkunanna tunisaqarnermi tamanna atuutinngilaq.

*Imm. 3.* Imm. 1-imi aalajangersagaq nunanut allanut timmisartukkut attaveqarlutik mittarfinni akitsuutitaqanngitsunik – Taxfreeenik – tunisinermut atuutinngilaq.

## **Kapitali 3**

*Nakkutilliineq*

**§ 4.** § 2-mi aalajangersakkap naapertuutsinneqarnissaanik Atuisartoqarnermut Unammilleqatigiinnermullu Aqutsisoqarfik nakkutilliisuuvooq. Atuisartoqarnermut Unammilleqatigiinnermullu Aqutsisoqarfik aalajangersakkamik unioqqutitsisoqarneranik paasinnippat, Atuisartoqarnermut Unammilleqatigiinnermullu Aqutsisoqarfik politimesterimut unnerluusseqqusilluni qinnuteqarsinnaavoq.

*Imm. 2.* § 3-mi aalajangersakkap naapertuutsinneqarneranik Akileraartarnermut Aqutsisoqarfik nakkutilliisuuvooq, aammalu eqqartuussivimmi aalajangiisoqanngikkaluartoq sukumiisumik kinaassutsimut upternarsaammik takutitsinikkut qaqqumulluunniit nioqqutissanik tuniniaanermik ingerlatsiviusuni inini, biilini il.il. nakkutilliinermik suliaqarsinnaavoq.

*Imm. 3.* Piginnittooq, inuillu tassani suliffeqartuuusut imm. 1 aamma 2 malillugit nakkutilliinerit ingerlannerini oqartussaasunut pisariaqartumik ilitsersuissapput ikuutissallutillu.

## **Kapitali 4**

*Pineqaatissiisarnermut aalajangersakkat*

**§ 5.** § 2, imm. 1-3-mik aamma § 3, imm. 1-imik unioqqutitsinerit Kalaallit Nunaanni pinerluttulerinermut inatsimmi maleruagassat malillugit akiliisitsinikkut pineqaatissiinernik malitseqarsinnaapput.

*Imm. 2.* Pissutsit sukannernerusimappata imaluunniit uteqqittumik pisoqartillugu kaaviaartitassatut naatsorsuutigineqartumut imaluunniit pissarsiarineqartumut naapertuutumik akileeqqusissuteqarluni pineqaatissiisoqarsinnaavoq.

*Imm. 3.* Inatsisartut inatsisaanni akileeqqusissumvik aalajangersaanissamik tunngavissiisoqarsimappat, Kalaallit Nunaanni pinerluttulerinermut inatsimmi maleruagassat malillugit inuit pisussaatitaasut pisinnaatitaasullu akileeqqusissuteqarnikkut pineqaatissinneqarsinnaapput.

*Imm. 4.* Akileeqqusissutit inatsisartut inatsisaat malillugit aalajangersarneqartut Nunap Karsianut tutsinneqassapput.

## **Kapitali 5**

*Atortuulersitsinermut ikaarsaariarnermilu aalajangersakkat*

**§ 6.** Inuussutissarsiummik ingerlataqarnermut allagartaqarnissaq inatsisaasuni allani piumasaqaataappat piumasaqaatit taakku IIN-normumik upternarsaateqarnikkut naammassineqassapput.

*Imm. 2. Inatsisini allani piumasaqaataappat inuk imaluunniit inatsisit naapertorlugit inuk inuussutissarsiummut allagartartaanissamut piumasaqaatinik naammassinnittooq pineqarpat, piumasaqaat taanna naammassineqartutut isigineqassaaq, Kalaallit Nunaanni pinerluttulerinermut inatsimmi kapitali 36-mi maleruagassat naapertorlugit pisinnaatitaaffiaagaasoqarsimanngippat.*

**§ 7.** Inatsisartut inatsisaat ulloq 1. januar 2016 atuutilerpoq.

*Imm. 2. Tamatuma peqatigisaanik Kalaallit Nunaanni inuussutissarsiummik ingerlataqarneq pillugu Inatsisartut inatsisaat nr. 12, 12. november 2001-imeersoq atorunnaarsinneqarpoq.*

*Namminersorlutik Oqartussat, ulloq Xx.yy 2015*

Kim Kielsen